

Ням гарагийн үдээс хойших хуралдаан

2011 оны 4-р сарын 3

Их Эзэний хамгийн үнэ цэнэтэй адислалууд

Далын Ахлагч Карл Б.Пратт

Гэр бүлийн цуглааныг албан ёсоор хийж эхлэхээс ч өмнө хүүхдүүддээ сайн мэдээг заадаг байсан өвөг дээдэстээ би талархаж байна. Миний эмээг Айда Жесперсон, өвөөг Жонн А.Виттен гэдэг байв. Тэд Мексикийн Чивава дахь Колониа Хуарес хэмээх жижигхэн сууринд амьдардаг байлаа. Виттений хүүхдүүд эцэг эхийнхээ сургамж болон үлгэр жишээнээс сайн мэдээг суралцдаг байв.

1920-иод оны эхээр Мексикт хэцүүхэн цаг үе байлаа. Хүч хэрэглэсэн хувьсгал дөнгөж дуусаад байлаа. Тун бага мөнгө гүйлгээнд байснаас ихэнх нь зоосон мөнгө байлаа. Хүмүүс хувийн бизнесээ бараа, эд зүйлс солилцох аргаар явуулж байв.

Зуны сүүл сарын нэгэн өдөр Жон өвөө хоёр үхрээ 100 песотой (Мексикийн мөнгөн тэмдэгт) тэнцэх мөнгөн зоосоор зараад гэртээ иржээ. Тэр мөнгөө хүүхдүүдийнхээ сургуулийн төлбөрт зориулаарай гээд эхнэр Айдадаа өгөв.

Айда мөнгөтэй болсондоо баярласан ч тэднийх зуны турш аравны нэгээ төлөөгүйг Жонд сануулжээ. Тэд бэлэн мөнгөний орлогогүй ч мал амьтад нь мах, өндөг, сүүгээр хангаж, тарьсан жимс, ногоо нь хангалттай болохоор эд бараагаар солилцох боломжтой байв. Ийм учраас аравны нэгээ нөхөн төлөхийн тулд мөнгөө бишоптоо өгье гэж Айда хэлжээ.

Мөнгөөрөө хүүхдүүдийнхээ сургуулийн төлбөрийг төлнө гэж бодож байсан Жон бага зэрэг санаагаар унасан ч энэ санааг нь дэмжлээ. Тэгээд тэр зоос хийсэн хүнд цүнхээ аван аравны нэгийн оффист очиж, бишоптоо аравны нэгээ төлжээ.

Энэ явдлын дараахан Нэгдсэн Улсаас баян худалдаачин ноён Хорд хэдэн хүнтэй ууланд ан хийж, загасчлахаар ирэх сураг сонсогдов.

Жон өвөө Колониа Хуаресаас холгүйхэн байдаг төмөр замын буудал дээр тэднийг тосон уулзжээ. Тэрбээр унах морьд, ууланд явахад шаардлагатай аяны тоног төхөөрөмж болон ан амьтад зөөх уяа сэлт зэргийг бэлтгэсэн байв. Дараагийн долоо хоногийн турш тэр ирсэн гийчдэд газарчлан, аяллыг зохицуулж явав.

Долоо хоногийн эцэст нөгөөх хүмүүс Нэгдсэн Улс уруу буцахаар галт тэрэгний буудал дээр иржээ. Тэд Жоны ажилласан хөлсийг нь төлж, бусад зардлыг нь төлөхөд хангалттай уут дүүрэн мөнгөн зоос өгчээ. Ажилчдадаа хөлсийг нь төлж үлдсэн мөнгийг ноён Хордод

эргүүлэн өгөхөд хариулт өгнө гэж бодоогүй байсан тэрээр ихэд гайхжээ. Тэр Жоноос бүх зардал төлөгдсөн эсэхийг асуухад Жон аялалд зориулсан зардал бүгд төлөгдсөн. Энэ үлдсэн мөнгө нь гэжээ.

Галт тэрэг хөдлөх дохиогоо дуугаргахад ноён Хорд гэнэт эргэн хараад, зоостой уутыг Жон уруу чулуудан, “Үүнийг хөвгүүддээ зориулаарай” гэв. Жон ууттай зоосыг аваад, Колониа Хуаресийнхээ зүг явжээ.

Үдэш хоолоо идсэний дараа гэр бүлээрээ аяны сонин сонсохоор цугларахад Жон мөнгөтэй уутны тухай санан уутыг авчирч ширээн дээр тавив. Жон уутанд хэчнээн мөнгө байгааг сайн мэдэхгүй ч ууттай мөнгөн зоосыг ширээн дээр асгахад нэлээд том овоо болжээ. Зоосыг тоолоход яг 100 песотой тэнцэх мөнгөн зоос байлаа. Ноён Хорд энэ аяллыг хийхээр шийдсэн нь Виттений гэр бүлд асар их адислал болсон аж. Жон болон түүнтэй хамт ажилласан хөвгүүд нь сайн цалин хөлс аваад зогсохгүй үлдсэн 100 песо нь долоо хоногийн өмнө төлсөн аравны нэгийн дүнтэй яг таарч байв. Зарим хүмүүст энэ нь сонирхолтой тохиолдол мэт боловч, Виттений хувьд Их Эзэн итгэлтэйгээр аравны нэгээ төлдөг хүмүүст амласан амлалтаа биелүүлдгийн тод жишээ байлаа.

Хүүхэд байхдаа би энэ түүх нь, ууланд ан хийж, загасчилж, мориор аялсан тухай байсан учраас сонсох дуртай байлаа. Үүнээс гадна бид зарлигуудыг дагавал адислагдана гэдгийг ойлгуулсан учир би энэ түүхэнд дуртай байлаа. Энэ түүхээс бид аравны нэгийн тухай хэдэн зүйлийг мэдэж болно.

Нэгдүгээрт: Аравны нэгээ төлөхөд заавал мөнгөн орлого байх шаардлагагүйг та нар энэ түүхээс анзаарсан байх. Тэд мал болон ногооны талбай дээрх жимс ногооныхоо үр шимээр хангалттай амьдардаг учраас Виттенийхэн эхний олсон бэлэн мөнгөө тэр чигээр нь аравны нэгдээ зориулахаар шийдсэн ажээ. Тэд адислалуудынхаа хариуд өөрсдийгөө Их Эзэнд өртэй гэж үздэг байв.

Энэ нь “Хүн Бурханыг луйвардах уу? гэсэн ч та нар Намайг луйвардаж байна” гэсэн Их Эзэний үгсийг бидэнд сануулдаг. Хүмүүс Түүнээс “Бид Таныг яаж луйвардсан юм бэ?” гэж асуухад Их Эзэн сүр хүчтэйгээр: “Аравны нэгээр ба өргөлөөр” (Малахи 3:8) гэж хариулсан байдаг. Тийм ээ, ах эгч нар аа, яг л Жон Виттен, Айда Виттен хоёр хэдэн арван жилийн өмнө тэр нэгэн зун энэ сургаалыг ойлгож мэдсэний адилаар бид бүгд Их Эзэндээ өртэй. Бурханаа луйвардсан гэм буруутан бүү бай. Шударга байж, Их Эзэнд өрөө төлцгөөе. Тэрээр зөвхөн 10 хувийг л хүсдэг юм. Их Эзэнд өрөө төлөхөд шударга байх нь нөхөддөө шударга хандахад бидэнд туслах болно.

Энэ түүхээс ойлгож мэдсэн бас нэг зүйл бол эмээ өвөө хоёр минь ядуу тарчиг байсан ч аравны нэгээ төлдөг байсан явдал юм. Тэд Их Эзэний зарлигийг мэддэг учраас судрын үгсийг өөрсөдтэйгөө адилтган (1 Нифай 19:23–24-г үз), хуулинд дуулгавартай байжээ. Энэ бол Их Эзэний хүн бүрээс хүсэн хүлээдэг тэр зүйл мөн. Тэр биднээс аравны нэгийг элбэг

дэлбэг байдлаасаа бус гэр бүлийн төсвөөс үлдсэн мөнгөнөөсөө бус харин орлого бага ч бай их ч бай гагцхүү өөрийн анхны орлого “анхны үр төл”-өөс төлөхийг хүсдэг. Их Эзэн: “чи өөрийн анхны үр жимсээс өргөх өргөлөө бүү хойшлуул” (Египетээс Гарсан нь 22:29) гэж зарлигласан юм. Аливаа орлогоноос аль болох түргэн итгэлтэйгээр аравны нэгээ төлөх нь хамгийн баталгаатай арга зам гэдгийг би хувийн туршлагаасаа мэднэ. Энэ нь үнэхээр цорын ганц арга зам гэдгийг би мэдсэн.

Би аравны нэг нь чухамдаа мөнгөний асуудал биш харин Их Эзэнд итгэх итгэл гэдгийг эмээ өвөөгийнхөө түүхээс ойлгож мэдсэн юм. Хэрэв бид Түүний зарлигуудад дуулгавартай байвал Тэрээр адислалуудыг амласан билээ. Жон Виттен, Айда Виттен хоёр аравны нэгээ төлснөөр агуу итгэлийг үзүүлсэн юм. Аравны нэгээ төлж, Их Эзэндээ итгэлээ харуулцгаая. Аравны нэгээ бүхнээс урьд, үнэнч шударгаар төлж бай. Авсан багахан тэтгэмж эсвэл олсон бусад орлогоосоо аравны нэгээ төлж байхыг хүүхдүүддээ бас заа. Тэгээд тэднийг аравны нэгээ төлөхдөө дагуулж яв. Тэгснээр хүүхдүүд маань бидний үлгэр жишээгээр бидний Их Эзэний төлөөх хайрыг мэдэх болно.

Аравны нэгээ мөнгөөр төлөхөд Их Эзэн биднийг үргэлж мөнгөөр адисална гэж зарим хүн өвөө эмээгийн маань түүхийг буруугаар ойлгож магадгүй. Хүүхэд байхдаа энэ түүхийг би мөн тэгж ойлгосон. Хожим нь би энэ нь тийм биш гэдгийг ухаарч ойлгосон юм. Их Эзэн аравны нэгээ төлдөг хүн бүрийг адислахаар амласан билээ. Тэрбээр “тэнгэрийн цонхыг нээж, ивээлийг хальтал асгана” (Малахи 3:10) гэж амласан. Их эзэн амлалтуудаа бүрэн биелүүлдгийг би гэрчилж байна. Хэрэв бид итгэлтэйгээр аравны нэгээ төлбөл амьдралын аливаа хэрэгцээт зүйлсээр дутагдахгүй. Гэхдээ тэрээр эд баялгийг амлаагүй. Мөнгө болон банкны данснууд нь Их Эзэний үнэ цэнэтэй адислалууд биш. Тэрбээр хэрэгцээт эд юмсаа хэрхэн зөв зохицуулах, орлогынхоо 100 хувиар биш харин 90 хувиар илүү сайн амьдрах мэргэн ухаанаар биднийг адисалсан. Иймийн тул аравны нэгээ итгэлтэйгээр төлөгч тэд арвигч, хямгач амьдралыг ойлгодог бөгөөд илүү их бие даасан хүн болохыг зорьдог.

Их Эзэний хамгийн үнэ цэнэтэй адислал нь сүнслэг байдаг бөгөөд энэ нь гэр бүл, найз нөхөд, сайн мэдээтэй үргэлж холбоотой байдаг гэдгийг би ойлгосон юм. Ялангуяа гэрлэлт, хүүхэд хүмүүжүүлэх зэрэг гэр бүлийн асуудлаа зохицуулахад тэрээр ихэвчлэн биднийг Ариун Сүнсний нөлөө ба удирдамжийг үргэлж мэдрэх хүчээр адисалдаг мэт надад санагддаг. Иймэрхүү сүнслэг мэдрэмжтэй байснаар орон гэртээ амар амгалан, эвтэй найртай амьдардаг. Ерөнхийлөгч Жеймс И.Фауст “гэр бүл салалтаас хамгаалах хамгийн сайн арга бол аравны нэгээ төлөх явдал” гэж зөвлөсөн юм. (“Enriching Your Marriage,” *Лиакхона*, 2007 оны 4-р сар, 2–5).

Аравны нэгээ төлөх нь дуулгавартай, даруу мөн “бүх зүйл дээр түүний гарыг ... хүлээн зөвшөөрдөг” (С ба Г 59:21) талархалтай зүрх сэтгэлтэй болоход тусалдаг. Аравны нэгээ төлснөөр бид Христийн цэвэр хайраар дүүрэн, өгөөмөр, энэрэнгүй зүрх сэтгэлтэй болдог. Мөн бид Их Эзэний хүсэл зорилгод захирагдсан дуулгавартай зүрх сэтгэлээр бусдад үйлчилж, бусдыг адислах ирмүүн хүсэлтэй болдог. Аравны нэгээ тогтмол төлдөг гэр

бүлийн Их Эзэн Есүс Христэд итгэх итгэл нь хүчирхэгжиж, Түүний сайн мэдээ болон сүмийн тухай гэрчлэл нь баттай өсдөг. Эдгээр нь Их Эзэний хамгийн үнэтэй цэнэтэй адислалууд бөгөөд үүнийг мөнгө болон эд юмстай харьцуулшгүй юм.

Бид аравны нэгээ итгэлтэйгээр төлөх юм бол Их Эзэн тэнгэрийн цонхыг нээж, бидний дээр хамгийн үнэ цэнэтэй адислалуудаа асгах болно гэдгийг би гэрчилж байна. Есүс Христийн нэрээр, амен.